



Universitätsbibliothek Paderborn

**De Breviario Concionatorio, Strenæ, Fidelis Prophetissa
Concionibus de B. M. Virgine serviens, Conciones
Occurrentes & Funebres**

Tylkowski, Wojciech

Oliva, 1686

I. Quia Sanctissima.

[urn:nbn:de:hbz:466:1-51821](#)

C A P U T I I I .

Beatam dicunt Virginem omnes Cælestes.

1. Quia Sanctissima.

TA sancta est Virgo ut existens in utero plus habuerit de gratia, quam omnes in Cælo habeant Sancti, ut docet Franciscus Mayron de Virgin. dist. 3. q. 1. c. 3. Et Vasq: tom: 2. in 3. p. d. 119. c. 3. B. Virginem in instanti Conceptionis suæ, & deinceps plenum rationis usum in his saltē quæ ad Deum & virtutem pertinent habuisse; insuper, sine interruptione, sine tepiditate, sine defectu aliquo semper operata. Quantum igitur collegit gratiæ, dicat Joan. Euchaita 30. Jan. ode 5. in Meneis. Mortalis natura immortale Angelicam superavit ad fastigium sanctitatis currendo: in hac quippe prætenera Virgo Angelos nulla carne gravatos post se reliquit. Certè ex eo solo quod Mater Dei effecta, affluit S. Ildefons: serm. 1. de Assumpt: Christus eam Fons gratiæ, velut ignis ferrum decoxit, incanduit, ignivit. S. Abbas in Meneis 15. Aug. Virginis meritorum excessus omnem creatam cogitandi facultatem longissimè superat. Vetus est S. Justini Martyris sensus orat. de pace. Nullus mortalium, quamvis donorum multipliciter prædictus sit, Virginis valet coæquari. Et S. Ephrem. orat. de Virg. Sublimor est Cælicolis, purior solis radio, & splendoribus, namquæ, ut S. Anselmus de Concept. Virg. cap. 12. Decebat Virginem ea puritate nitore, quæ major sub Deo nequeat intelligi. Unde juxta S. Andr. Creten. de Assumpt: B. V. Excepto DEO solo omnibus est altior.

Gerson de Nativit. acceptâ in fundamentū doctrinâ S. Dionysij de Angelis. Habet hoc Hierarchicus ordo secundum Dionysium, ut inferiorum virtutes sint in superioribus perfectiori modo repositæ. Quemadmodum sapientia perfectior in Seraphim, quam in Cherubim. Est autem Maria super choros Angelorum per gratiam, & gloriam sublevata: erant igitur in ea perfectiones creaturarum irrationalium, & rationalium etiam Angelicarum eminentiori quadam modo reperibiles. Imò juxta Greg. Mag. in 1. Reg. 1. Maria meritorum verticem supra omnes Angelorum choros usque ad solium Deitatis evexit. Theodoret. lib. 3. in cantic. Maria inter tot hominum quæ salvantur animas, veluti electa columba, non solum pulchra penitus, & immaculata, sed etiam quæ puritate Cherubim, & Seraphim antecellit.

Et Rupert. lib. 6. in cantic. ita illam affatur. Quando Spiritus S. in te super-
venit, & Filium Virgo conceperisti, tunc tu, & ex tunc pulchra facta es pulchri-
dine Divinâ. Hailgrinus in cap. 7. Cant. citatus à Nayan. in elect. lib. 4. n. 425. Non
minùs ait, meruit fundendo lac de uberibus suis ad Filij nutrimentum, quām Mar-
tyres meruerunt fundendo sanguinem suum in Martyrio. Ex quo patet quantopere
gratiam augebat per opera, etiam per illa, quæ alias per se non sunt meritoria,

Præclarè hanc Virginis sanctitatem videtur mihi figurasse Arca Noë, quæ utiq;
juxta plerosque Patres hanc Virgem notabat Gen. 7. Ferebatur super aquas. Apoc. 17.
Aqua populi sunt. Itaque super sanctitatem populorum ferebatur. Christ. Iesu
serm. de B. Virg. ita eidem loquitur. Gratia plena es, quia tecum est universus gratia
thesaurus. Et S. Athanasius explicatiū orat. de S. Deip. Spiritus S. in Virginem de-
scendit, cum omnibus suis essentialibus virtutibus, imbuens eam gratia, ut in omni-
bus grata esset, atque idcirco gratia plena cognominata est, eo quod ab impletione
Spiritus S. omnibus gratiis abundaret.

Unde juxta Autorem imperfecti operis in Matth. S. Joseph maluisset credere sine
viro mulierem concipere posse quām Mariam peccavisse. Nimurum ut ait Petrus
Damii: serm. de Assumpt: Quid sanctitatis? quid justitiae? quid Religionis? & per-
fectionis singularis huic Virgini deesse potuit, quæ totius gloriae Divinae Charismata
plena fuit? in Cathechismo Græcano appellatur Deiparens intaminata, impolluta,
immaculatissima, sanctissima, illibatissima, reverendissima.

**2. Quia omnia dona quæ omnes habent Cælestes,
accepit uberioris.**

Virginem S. alloquitur Idiot. cap. 2. contempn. Non deficit tibi ò Virgo, puri-
tas Angelorum, non fides Patriarcharum, non scientia Prophetarum, non zelus A-
postolorum, non patientia Martyrum, non sobrietas Confessorum, non innocentia
& humilitas Virginum: in summa in nullo genere vacasti virtutum ò Virgo plus
quām Beata. Quodcumque donum alieui Sanctorum unquam datum fuit, tibi non
fuit negatum, sed omnium sanctorum Privilegia omnia habes, ia te congeta. S. Bo-
navent. Spec. cap. 3. Omnia flumina intrant in Mare, dum omnia charismata intrant
in Mariam. Flumen enim gratiae Angelorum intrat in Mariam, flumen Patriarcha-
rum, & Prophetarum intrat in Mariam, flumen gratiae Apostolorum intrat in Mari-
am, flumen gratiae Martyrum intrat in Mariam, flumen denique Confessorum, Vir-
ginum & Doctorum intrat in Mariam: Omnia flumina intrant in Mariam juxta
illud Eccles. 1. *Omnia flumina intrant in mare.*

S. id